

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO DOBOJSKI KANTON  
OPĆINA DOBOJ JUG  
OPĆINSKO VIJEĆE**

**NACRT**

Broj:

Datum:

Na osnovu odredaba Zakona o upravljanju otpadom („Sl.novine F BiH“ br.33/03), Zakona o komunalnim djelatnostima („Sl.novine ZE-DO Kantona“ br.17/08), člana 23. Statuta Općine Doboj Jug („Službeni glasnik Općine Doboj Jug“, broj: 03/08, 01/12 i 02/13), te člana 79. Poslovnika Općinskog vijeća Doboj Jug („Službeni glasnik Općine Doboj Jug“, broj: 04/08, 01/13, 02/20 i 03/21) Općinsko vijeće Doboj Jug na sjednici VIII saziva održanoj dana \_\_\_\_\_, donosi

**ODLUKU  
O IZMJENI I DOPUNI ODLUKE O KOMUNALNOM REDU**

**Član 1.**

U Odluci o komunalnom redu općine Doboj Jug („Službeni glasnik općine Doboj Jug“, broj:04/10) , (u daljnjem tekstu: Odluka) iza člana 99. dodaje se novo poglavlje VIIIa. i članovi 99a., 99b., 99c., 99d. i 99e. i glasi:

**VIIIa. - DRŽANJE ŽIVOTINJA**

**Član 99a.**

Na užem gradskom području bezuslovno je zabranjeno držanje stoke (krupne i sitne), pasa, mačaka, zečeva – kunića i peradi, a samim tim i posjedovanje štala, kokošinjaca, boxeva za pse, kaveza za zečeve i sličnih objekata.

Bezuslovna zabrana držanja stoke (krupne i sitne),pasa, mačaka, zečeva-kunića i peradi,a samim tim i na posjedovanje štala, kokošinjaca, boxeva za pse, kaveza za zečeve i sličnih objekata odnosi se i na sav ostali prostor na području općine Doboj Jug, u krugu prečnika od 50 metara od objekata u kojima se vrše javni poslovi ili okuplja veći broj građana,a posebno zdravstvenih ustanova, škola, vrtića – predškolskih ustanova, trgovačkih objekata, ugostiteljskih objekata, pekara i drugih objekata od opšteg interesa (igrališta, dječija igrališta, izletišta, autobuska stajališta, rezervoari vode, lokalna izvorišta čija se voda koristi za piće, pijace i sl.) . Prečnik se mjeri od centra objekta za objekte do 100 m2 , od uglova objekta za objekte preko 100 m2 površine, od uglova parcele na kojoj se nalazi igralište .

**Član 99b.**

Odredbe člana 100. ne odnose se na luksuzne ptice (paun, labud, soko, papiga, kanarinac i sl.), lovačke i čistokrvne pasminske pse koji su prethodno podvrgnuti veterinarskom pregledu – cijepljenju i čipovanju , pod uslovom da se time ne remeti javni red i mir ostalih građana i korisnika poslovnih prostora,te da se isti drže u stanovima (kućama) ili posebnim boksevima , uz poštivanje sanitarno-higijenskih propisa.

Činjenicu,da li se držanjem životinja iz stava 1.ovog člana remeti javni red i mir (misli se na pretjeran lavež pasa ili pretjerano ispuštanje krikova ptica) ,utvrđuje i o tome odlučuje svojim rješenjem , nadležni općinski komunalni inspektor i drugi nadležni organi,a na zahtjev zainteresovanog lica.

**Član 99c.**

Pod užim gradskim područjem u smislu člana 99a. ove odluke smatra se zona koja je obilježena na karti, koja je sastavni dio ove odluke.

**Član 99d.**

Izvan dvorišnog prostora psi se mogu kretati samo u pratnji vlasnika,na povodcu i sa zaštitnom korpom na glavi za pse čije su pasmine poznate kao opasne po druge ljude osim po vlasnika psa.

Zabranjeno je slobodno kretanje pasa po javnim i ostalim naseljenim ili nenaseljenim površinama. Takvi psi smatrać će se lutalicama i bit će zbrinuti po zakonu o zaštiti životinja. Odredbe stava 1. i 2. ovog člana ne odnose se na lovačke pse u dane lova i odbjegle kućne ljubimce, ali ne duže od tri dana od dana saznanja da su odbjegli. Vlasnici kućnih ljubimaca, u slučaju njihovog iznenadnog napuštanja ili gubljenja traga dužni su u roku od 24 sata prijaviti njihov nestanak lovačkom društvu ili putem lokalnih sredstava informisanja (radija) obavjestiti građane o njihovom nestanku, kako bi se izbjegle posljedice iz stava 3. ovog člana.

#### Član 99e.

Izvan užeg gradskog područja držanje stoke (krupne i sitne), pasa, mačaka, zečeva – kunića i peradi, a samim tim i posjedovanje štala, kokošinjaca, boxeva za pse, kaveza za zečeve i sličnih objekata izuzev prostora u prečniku od 50 metara od objekata navedenih u stavu 2. člana 100., dozvoljeno je pod sljedećim uslovima:

1. da za smještaj stoke, pasa, mačaka, zečeva - kunića i peradi postoje posebno izgrađeni adekvatni prostori, koji moraju biti udaljeni od najbližeg stambenog objekta, puta i vodnog objekta najmanje 15 m.
2. da prostorije za držanje stoke udovoljavaju građevinsko-urbanističkim i sanitarno-higijenskim uslovima i da su priključene na vodovodu mrežu,
3. slivnici iz štala moraju biti priključeni na đubrišnu i osočnu jamu izgrađenu od betona po sanitarno-higijenskim propisima,
4. da se redovno vrši čišćenje i pranje gospodarskih objekata (štala, kokošinjaca, bokseva i sl.), a najmanje dva puta godišnje da se izvrši preventivna deratizacija, dezinfekcija i dezinfekcija istih.
5. da se sve životinje redovno podvrgavaju veterinarskoj kontroli,
6. neposredna okolina gospodarskih objekata mora biti besprijekorno čista i uredna,
7. da se đubrivo-izmet odlaže isključivo na način i pod uslovima propisanim ovom Odlukom.

#### Član 2.

U članu 127. stav 1. iza tačke 26. dodaje se nova tačka 27., i glasi:  
„ 27. ako postupa suprotno odredbama člana 99a „,

#### Član 3.

U članu 128. stav 1. iza tačke 67. dodaju se nove tačke 68. i 69., i glasi:  
„ 68. ako postupi suprotno odredbama člana 99d.,  
69. ako ne ispunjava uslove propisane članom 99e. „

#### Član 4.

Ova Odluka stupa na snagu osmog dana od dana objavljivanja u Službenom glasniku Općine Doboj Jug.

Predsjedavajući Općinskog vijeća  
Hasan Škiljo



## PRAVNI OSNOV:

Pravni osnov donošenja Odluke o izmjeni odluke o komunalnom redu je Zakon o upravljanju otpadom (Sl. novine F BiH“ br. 33/03), Zakon o komunalnim djelatnostima (Sl. novine ZE-DO Kantona br. 17/08).

Naime na 17. sjednici petog saziva OV održanoj dana 29.10. 2010. godine usvojen je nacrt Odluke o komunalnom redu, te je zaključkom određeno da se u roku od 30 dana sprovede javna rasprava na usvojeni nacrt odluke. Sva relevantna privredna društva, Javne ustanove i pojedinci su pozvani da se uključe u javnu raspravu, te da na nacrt Odluke daju svoje primjedbe i prijedloge u pisanom obliku. Na navedenu raspravu su se odazvala samo tri subjekta i dostavili svoje pisane primjedbe i prijedloge. Navedeni prijedlozi i primjedbe su razmotreni, te su oni koji su opravdani i uvršteni u Odluku. Obzirom da je odziv na javnu raspravu bio mali odlučeno je da se ponovo organizira rasprava u vidu šireg kolegija Općinskog vijeća tako da je u Sali Općinskog vijeća dana 13.12.2010. godine sa početkom u 16 00 sati održana navedena javna rasprava šireg Kolegija OV na kojoj je bilo prisutno 12 lica, te se redom raspravljalo o svim članovima Odluke koji su po svom sadržaju bili interesantni za diskusiju. Na navedenoj raspravi usaglašeni su određeni članovi, a preovladavalo je mišljenje da se iz odluke potpuno izbriše poglavlje koje je uređivalo držanje životinja. Zaključeno je da se za ovo poglavlje još uvijek nisu stvorili uslovi na terenu kako bi se moglo sprovesti. Naime ukoliko bi se isto zadržalo u odluci moglo bi dovesti do određenih negativnih pojava na terenu. Prijedlog odluke sadrži 137 članova za razliku od nacrta koji je imao 142 člana jer je 5 članova koji regulišu oblast držanja životinja kao zaključak javne rasprave izbačeno iz odluke.

Obzirom da se u zadnje vrijeme sve više građana pojavljuje sa zahtjevima da se u njihovom okruženju zabrani držanje stoke jer im držanje iste i neuredni prostori u kojima se drži izazivaju nesnošljiv smrad, pojavu muha, komarca i ostalih insekata, te je život u takvom okruženju napodnošljiv, odlučeno da se postojeća Odluka o Komunalnom redu izmijeni i dopuni na način da se uvede novo poglavlje koje uređuje držanje životinja, te je isto i dodato na način kako je i predviđemo u Odluci o izmjeni i dopuni navedene Odluke o komunalnom redu.